



吳 榮 富

民國四十年生

成大中文博士班

現職／成大中文系講師

作品／青衿詩集

曾獲／成大鳳凰樹文學獎古典詩組

第六、七、八、九屆正獎

宿墾丁聽落山風

金飆一夜激怒濤，陣馬風檣交兵刀。弩浪射天似傾漢，
萬頃奔瀉鳴滔滔。崖摧谷動慘慄冽，渾掀水殿拋龍鰲。
心凝氣懾不能寐，推窗仰視星辰高。急啟館門逢館吏，
為言今宵落山颺，翻洋撞岳天欲裂，走顛飛退安可秉蠟
遨？點頭一笑俯稱謝，回登樓頂斟芳醪，忽見鵝鸞燈塔
遠熠熠，頓覺意氣歐公豪。身搏扶搖若鯤化，神鶻雄飛
揚九皋。此生多情不適意，今夜正堪憑君萬里翱。

傷髮吟

已稀無三丈，微雲不作雨，沖沐傷又落，如驚崖崩土。
亂絲塞溝流，氾濫水閘堵。雖欲無毀傷，歲月利如斧，
當真莫苦吟，詩成髮難補。

偕古典詩研習營諸學員遊夢幻湖

人世多醒者，獨醉成殊科。一湖立名異，四望空無波！
探足雲霧動，靉靆張煙羅。遂令言醒客，頓覺迷幻多。
飛閣喜成簇，縹緲浮山阿；七星明滅裡，水韭落天河。
幻境獨嫵媚，行吟多嬌娥，穿梭談聲律，闊論指沉痾。
唐音雖不復，情性難滅磨。是雲還為水，樵子忘爛柯。
我醒真是夢，怕聽高明歌。

蘭嶼

蘭花不見剩空名，一路無人犬豕行；石屋橫斜連畫舫，
漁歌隱約出濤聲。

電腦

人間無處不瘋狂，昏旦開機連線忙；頻按鍵盤推滑鼠，
常登網路覓亡羊。咖啡漫續三杯少，補帖時增一味長；
自笑殘唐老餘孽，好將舊律寫新章。

詠蘆

一片晴天雪，平鋪江上秋，揚風揮玉塵，弄影散絨毬。
瘦骨因詩累，繁花為節休，知音唯有月，歲歲解君愁。

紗帽山

唯天無我世為難，紗帽閒拋幻碧巒，萬古狂風吹不動，
人間底事怕彈冠。

梅花湖戲筆

一鏡琉璃自作花，花中天地樂魚蝦，不知鶴子今何處，
莫引林逋錯認家。

周莊二首

水鄉一角映霞明，古屋如鱗櫛次生；行到迷樓南社散，
小舟無力載豪情。

古香如此復何求，四面湖光夏日秋；想像芸窗千卷罷，
後堂悄悄放吟舟。

山鳥（杉林溪松瀧瀑布前所見）

深谷迴翔結伴遊，山風山雨日清秋，高枝揀盡泉邊立，
顧影梳翎語石頭。

蟲書

不晴不雨向黃昏，霜葉捎秋拾落痕，蟲字細鑄祖龍篆，
群經疑有未收言。

舟行望神女峰

舟繞巫山江水流，襄王一夢恨悠悠；晴峰神女分明見，
一了千秋雲雨愁。

別黃鶴樓乘飛機向黃山途中看雲

樓辭黃鶴向黃山，俯瞰浮雲足底間；霄際堪驕列禦寇，
御風不用待仙班。

遊黃山

黃山未到問如何？始信峰前不信多；怪石怪松浮地脈，
奇岩奇壑逼天河。滄桑昔日曾為水，雲海而今復見波；
棋局猶橫柯久朽，還疑此處是仙窩。

過千島湖（新安江水庫）

桑田真箇復揚波，千島浮沉不忍歌；萬戶無人魚出沒，
紅珠作室鰕為窠。

註：紅珠，魚名，湖中八十五種魚類之一，是日舟中所食。自新安江水庫築成，淳安、遂安二縣皆沉湖底，二十四萬人被迫外移。遊艇所經，猶見空屋半浮水際，不禁淒然為詠。

西湖畔謁岳王墓

六月西湖似美人，臨安史遠事如新；岳王忠盡嗟何用？
富貴從來屬佞臣。

賀玲玲學姊惠贈三峽黃山風景照二十六幅

黃山披影若重遊，回首蓬萊已素秋；耳際猶鳴三峽水，
醒來尚似在行舟。